



Starfsleyfisskilyrði fyrir Faxaflóahafnir sf. vegna móttöku á úrgangi til endurnýtingar

1. Almenn ákvæði og gildissvið

- 1.1 Starfsleyfi þetta gildir fyrir starfsemi Faxaflóahafna sf., kt: 530269-7529 hér eftir nefnt rekstraraðili, við Klettagarða. Starfsleyfið er gefið út í samræmi við lög nr. 7/1998 um hollustuhætti og mengunarvarnir, með síðari breytingum og reglugerð nr. 550/2018 um losun frá atvinnurekstri og mengunarvarnaeftirlit. Ennfremur gilda um starfsemina lög nr. 55/2003 um meðhöndlun úrgangs, reglugerð nr. 803/2023 um meðhöndlun úrgangs, og reglugerð nr. 1400/2020 um mengaðan jarðveg. Til viðbótar við starfsleyfisskilyrði þessi ber að fylgja, eins og við á, ákvæðum almennra starfsleyfisskilyrða heilbrigðisnefndar Reykjavíkur fyrir mengandi starfsemi.
- 1.2 Rekstraraðili ber ábyrgð á starfseminni að öllu leyti, þar með talið að lögum og reglum, sem eiga við um starfsemina, sé fylgt sem og kröfum í starfsleyfisskilyrðum og samþykktum sveitarfélaga eftir því sem við á. Rekstraraðili ber ábyrgð á að starfsemin fari fram með þeim hætti að hvorki fólki né umhverfi stafi hættu af. .
- 1.3 Starfsleyfið gildir fyrir endurvinnslu á úrgangi sbr, lið 8.5 í viðauka X í rg. 550/2018, þ.e. móttöku á óvirkum úrgangi, sjá nánar kafla 2.
- 1.4 Starfsleyfið gildir frá útgáfudegi til 30.12.2030.
- 1.5 Heimilt er að endurskoða starfsleyfið ef í ljós koma annmarkar á framkvæmd þess, mengun af völdum atvinnurekstrarins er meiri en búast mátti við þegar leyfið var gefið út eða ef breytingar verða á bestu aðgengilegu tækni sem gerir kleift að draga umtalsvert úr losun án óhóflegs kostnaðar. Jafnframt skal endurskoða starfsleyfið ef öryggi við rekstur krefst þess að önnur tækni sé notuð en upphaflega var miðað við, ef breytingar verða á atvinnurekstri, ef fram kemur ný tækni er leiðir til bættra mengunarvarna eða ef nýjar reglur um mengunarvarnir taka gildi. Um endurskoðun á starfsleyfi skal fara samkvæmt gr. 14 í rg. 550/2018.
- 1.6 Ef rekstraraðili fyrirhugar að gera breytingar á eðli, virkni eða umfangi starfseminnar sem varðað geta starfsleyfið ber honum að tilkynna Heilbrigðiseftirliti Reykjavíkur það tímanlega, sbr. gr. 13 í rg. 550/2018. Heilbrigðiseftirlitið metur upplýsingarnar innan fjögurra vikna frá móttöku þeirra og tilkynnir rekstraraðila skriflega um það hvort nauðsynlegt sé að gefa út nýtt starfsleyfi.
- 1.7 Öll mengunaráhöpp þar sem hættuleg efni eða spilliefni berast í fráveitu, jarðveg, sjó eða yfirborðsvatn ber tafarlaust að tilkynna Heilbrigðiseftirlitinu.
- 1.8 Fylgi rekstraraðili ekki ákvæðum starfsleyfis, laga og reglugerða um mengunarvarnir á starfssviði sínu eða fyrirmælum eftirlitsaðila um úrbætur getur eftirlitsaðili beitt ákvæðum XVII kafla laga nr. 7/1998 um hollustuhætti og mengunarvarnir til að knýja á um úrbætur.
- 1.9 Rekstraraðili ber ábyrgð á umhverfistjóni eða yfirvofandi hættu á slíku tjóni af völdum atvinnustarfsemi sinnar sbr. lög nr. 55/2012 um umhverfisábyrgð og skal koma í veg fyrir tjón eða bæta úr tjóni ef það hefur orðið og bera kostnað af ráðstöfunum sem af því leiðir.
- 1.10 Um opinbert eftirlit heilbrigðisnefndar Reykjavíkur með starfseminni fer skv. 57. gr. reglugerðar nr. 550/2018.



- 1.11 Starfsleyfi skal hanga uppi á áberandi stað í fyrirtækinu. Eintak af starfsleyfisskilyrðunum skal ávallt tiltækt á vinnustað og skal rekstraraðili bera ábyrgð á því að efni þeirra sé kynnt viðkomandi starfsmönnum.
- 1.12 Almennigur á rétt á aðgengi að upplýsingum um starfsleyfi og starfsleyfisumsókn í samræmi við ákvæði í viðauka IV í rg. 550/2018. Heilbrigðiseftirlit Reykjavíkur birtir þær upplýsingar og niðurstöður eftirlits opinberlega. Birtingin er á vefsíðu embættisins eða með öðrum aðgengilegum hætti.

2. Starfsemi.

- 2.1 Faxaflóahöfnum er heimilt að taka á móti óvirkum úrgangi til endurnýtingar. Heimildin nær til móttöku á uppgröfnum, ómenguðum jarðefnum, s.s. grjóti, mól, sandi og öðru fyllingarefni sem fjarlægja þarf af byggingarsvæðum eða vegna annarra framkvæmda á höfuðborgarsvæðinu. Heimilt er að taka á móti allt að 350.000 m³ á gildistíma starfsleyfis. Hámarks magn á athafnasvæðinu hverju sinni er 15.000 m³. Ekki er gert ráð fyrir móttöku á stærra grjóti en sem svarar grjóti af flokki 1 (1.000 – 5.000 kg.).
- 2.2 Óheimilt er að taka á móti öðrum úrgangi en talinn er upp í gr. 2.1, þ.m.t. menguðum jarðefnum, steypu, múrbrotum, hellum, rorum eða öðrum framleiðslueiningum úr steinsteypu, blautri steypu eða steypuslammi, malbiki eða asfalti, lífrænum úrgangi af nokkru tagi, byggingarefni t.d. vegna niðurrifs húsa eða brunarústa og málmum.
- 2.3 Leggja skal mat á efni við móttöku. Standist efnið ekki kröfur skal það fjarlægt og komið til endurnýtingar, endurvinnslu eða fargað eins og lög og reglugerðir mæla fyrir um. Við mat á því hvort efni er mengað skal hafa hliðsjón af viðmiðum í viðauka í reglugerð nr. 1400/2020 um mengaðan jarðveg.
- 2.4 Halda skal skrá yfir magn og gerð úrgangs sem tekið er á móti. Skráningar skulu vera aðgengilegar eftirlitsaðila.
- 2.5 Rekstraraðili skal hafa viðbragðsáætlun um meðhöndlun úrgangs á athafnasvæði sínu ef kemur til óvæntrar stöðvunar á rekstri starfseminnar, hvort sem er til skemmri eða lengri tíma. Viðbragðsáætlun skal innihalda tillögur um meðferð og förgun úrgangs þann tíma sem starfsemin liggur niðri. Viðbragðsáætlunin skal vera aðgengileg eftirlitsaðila.

3. Athafnasvæði og lóðarmörk, ásýnd svæðis, umgengni og geymsla úrgangs.

- 3.1 Starfsemin skal takmörkuð við afmarkað svæði á mynd 1. Athafnasvæði skal vera afgirt til að hindra aðgengi almennings að athafnasvæðinu, hlið skulu vera læst utan vinnutíma. Lóð skal vera snyrtileg og vel við haldið. Tækjum, lausamunum, úrgangi og annað sem tilheyrir rekstraraðila skal snyrtilega komið fyrir á umráðasvæðinu og þannig að ekki valdi slyshættu. Halda skal vinnusvæði, tækjabúnaði og umhverfi eins snyrtilegu og kostur er á og gæta hreinlætis í hvívetna.
- 3.2 Til að lágmarka ónæði í nærumhverfi skal opnunartími vera frá kl. 8-19 virka daga vikunnar.
- 3.3 Sé húsnæði til staðar vegna starfseminnar skal því haldið snyrtilegu og vel viðhaldið og við það skal vera viðurkennd sorpílát til flokkunar úrgangs sbr. ákvæði reglugerðar um nr. 803/2023 um meðhöndlun úrgangs. Girðingum skal vel við haldið.
- 3.4 Rekstraraðila ber að gæta þess að lóð og athafnasvæði mengist ekki eða þar safnist fyrir úrgangur, hlutir, búnaður og annað sem ekki tilheyrir starfseminni.



- 3.5 Áhersla skal lögð á jafna móttöku efnis, eins og hægt er, og snyrtilegan frágang þess sem berst á svæðið.

4. Mengunarvarnir

- 4.1 Rekstraraðila ber að tryggja að atvinnureksturinn sé með þeim hætti að allar viðeigandi mengunarvarnir séu viðhafðar, og til þess sé beitt bestu aðgengilegu tækni (BAT), hafi hún verið skilgreind. Þegar aðferðum er beitt við mengunarvarnir sem valda því að mengun færist á milli andrúmslofts, vatns og jarðvegs skal lágmarka neikvæð heildaráhrif á umhverfið. Mengun sem getur borist langar leiðir eða til annarra landa skal haldið í lágmarki og tryggja skal viðtæka umhverfisvernd. Nýta skal orku vel.
- 4.2 Rekstraraðili skal ávallt leitast við að takmarka notkun mengandi efna við starfsemina. Til að lágmarka loftmengun er óheimilt að hafa kolefnaeldsneytisknúnar vinnuvélar eða bifreiðar í gangi umfram það sem tengist starfseminni og eðlilegri umferð.
- 4.3 Við alla vinnslu skal gæta sérstaklega að áhrifum á nærumhverfi. Hindra skal fok úr efnishaugum með því að vökva eða bleyta í haugum eftir þörfum eða með yfirbreiðslum. Hreinsa þarf og sópa efni sem fellur af bílum á aðkomuleið ekki sjaldnar en 1 sinni í viku og oftár ef þörf er á. Ef aðstæður kalla á getur HER krafist þess að settur verði upp dekkjaþvottabúnaður til að draga úr rykmyndun.
- 4.4 Halda skal hávaða við vinnslu hráefnis og vegna annarra athafna, svo sem umferðar um athafnasvæðið, í lágmarki. Um hávaða fer skv. reglugerð nr. 724/2008 um hávaða. Hávaði skal vera undir þeim viðmiðunarmörkum fyrir atvinnustarfsemi sem tilgreind eru í töflu III í reglugerð um hávaða.

5. Fráveita

- 5.1 Frárennsli frá salernum og starfsmannaaðstöðu skal fara í frárennsliskerfi Reykjavíkurborgar. Heimilt er að hafa færanleg salerni við starfsemina með innbyggða tanka fyrir úrganginn.
- 5.2 Verði vart við mengun af völdum afrennslis frá vinnslu í viðtaka eða ofanvatni ber rekstraraðila að bregðast við til að koma í veg fyrir frekari mengun. Hafa skal fullt samráð við Heilbrigðiseftirlitið um til hvaða ráðstafana verði gripið.

6. Skráningar og eigið eftirlit

- 6.1 Fyrirtækið skal vera með skriflegt innra eftirlit með vinnslunni. Skrá skal magn og gæði efnis sem berst á svæðið svo og uppruna þess.
- 6.2 Skrá skal allar kvartanir sem rekstraraðila berast vegna starfseminnar og viðbrögð við þeim. Skráningar skulu vera aðgengilegar við eftirlit.

7. Starfsemi hætt

- 7.1 Verði rekstri hætt, tímabundið eða varanlega, skal gera ráðstafanir til þess að úrgangi, efnnum og búnaði verði ráðstafað á viðurkenndan hátt til að fyrirbyggja mengun. Tilkynna skal Heilbrigðiseftirliti Reykjavíkur með a.m.k. mánaðar fyrirvara um fyrirhugaða stöðvun reksturs og ráðstafanir þar að lútandi.
- 7.2 Flytji starfsemin eða leggist niður skal rekstraraðili hreinsa athafnasvæðið. Hreinsunin skal fara fram í samráði við Heilbrigðiseftirlit Reykjavíkur.



7.3 Við rekstrarstöðvun eða lok starfsemi skal öllum úrgangi komið til viðurkenndra móttökustöðva.

7.4 Hreinsun telst ekki lokið fyrr en úttekt Heilbrigðiseftirlits Reykjavíkur hefur farið fram.



Mynd 1. Afmörkun athafnasvæðis Faxaflóahafna vegna móttöku á úrgangi til endurvinnslu (ómengað jarðefni) á landfyllingu við Klettagarða sbr. tillögu að starfsleyfi.